



**BOSNA I HERCEGOVINA**

**IZVJEŠTAJ O OBAVLJENOJ FINANSIJSKOJ REVIZIJI**

*KONKURENCIJSKOG VIJEĆA  
ZA 2020. GODINU*



URED ZA REVIZIJU INSTITUCIJA BiH  
КАНЦЕЛАРИЈА ЗА РЕВИЗИЈУ ИНСТИТУЦИЈА БИХ  
AUDIT OFFICE OF THE INSTITUTIONS OF BOSNIA AND HERZEGOVINA

[www.revizija.gov.ba](http://www.revizija.gov.ba)



**IZVJEŠTAJ**  
**O OBAVLJENOJ FINANSIJSKOJ REVIZIJI**  
**KONKURENCIJSKOG VIJEĆA**  
**ZA 2020. GODINU**

Broj: 02-16-1- 713 /21

**Sarajevo, juni 2021. godine**

## Sadržaj

<b>I</b>	<b>MIŠLJENJE NEZAVISNOG REVIZORA.....</b>	<b>5</b>
1.	MIŠLJENJE O FINANSIJSKIM IZVJEŠTAJIMA .....	5
2.	MIŠLJENJE O USKLAĐENOSTI.....	7
<b>II</b>	<b>IZVJEŠTAJ O REVIZIJI.....</b>	<b>9</b>
1.	KRITERIJI .....	9
2.	REALIZACIJA RANIJIH PREPORUKA .....	9
3.	SISTEM INTERNIH KONTROLA.....	9
4.	BUDŽET .....	10
5.	FINANSIJSKI IZVJEŠTAJI .....	10
5.1	Pregled rashoda i izdataka iz budžeta .....	11
5.1.1	<i>Bruto plaće</i> .....	11
5.1.2	<i>Unajmljivanje imovine i opreme</i> .....	12
5.2	Pregled prihoda i primitaka .....	12
5.3	Bilans stanja .....	12
5.3.1	<i>Popis sredstava i obaveza</i> .....	13
6.	ZAPOŠLJAVANJE I STATUS ANGAŽOVANIH OSOBA .....	13
7.	JAVNE NABAVKE .....	14
8.	KOMENTARI .....	14
<b>PRILOZI</b>	<b>.....</b>	<b>14</b>

# I MIŠLJENJE NEZAVISNOG REVIZORA

Mišljenje nezavisnog revizora se daje na osnovu provedene finansijske revizije koja obuhvata reviziju finansijskih izvještaja i, u vezi s istom, reviziju usklađenosti aktivnosti, finansijskih transakcija i informacija s relevantnim zakonima i drugim propisima.

## 1. MIŠLJENJE O FINANSIJSKIM IZVJEŠTAJIMA

### ***Mišljenje***

Izvršili smo reviziju finansijskih izvještaja **Konkurencijskog vijeća (u daljem tekstu: Vijeće)** koji obuhvataju: bilans stanja na 31.12.2020. godine, pregled prihoda, primitaka i finansiranja po ekonomskim kategorijama, pregled rashoda i izdataka iz budžeta, po ekonomskim kategorijama, posebne podatke o plaćama i broju zaposlenih, pregled dinamike zapošljavanja, pregled stalnih sredstava u obliku stvari i prava, pregled kapitalnih ulaganja, pregled doznaka iz tekuće rezerve budžeta, za godinu koja završava na taj dan i analizu izvršenja budžeta – tekstualni dio, uključujući i rezime značajnih računovodstvenih politika.

**Prema našem mišljenju, finansijski izvještaji Vijeća prikazuju istinito i fer, u svim materijalnim aspektima, finansijsko stanje imovine, obaveza i izvora sredstava na 31.12.2020. godine i izvršenje budžeta za godinu koja se završava na navedeni datum, u skladu sa prihvaćenim okvirom finansijskog izvještavanja.**

### ***Osnova za mišljenje***

Reviziju smo obavili u skladu sa Zakonom o reviziji institucija Bosne i Hercegovine i Međunarodnim standardima vrhovnih revizionih institucija (ISSAI). Naše odgovornosti prema tim standardima su detaljnije opisane u odjeljku *Odgovornosti revizora za reviziju finansijskih izvještaja*.

Nezavisni smo od **Vijeća** u skladu sa etičkim zahtjevima koji su relevantni za našu reviziju i ispunili smo ostale etičke odgovornosti u skladu sa tim zahtjevima.

Vjerujemo da su revizionni dokazi koje smo pribavili dovoljni i odgovarajući da osiguraju osnovu za naše mišljenje.

### ***Skretanje pažnje<sup>1</sup>***

Ne izražavajući rezervu na mišljenje o finansijskim izvještajima, skrećemo pažnju na sljedeće:

- *Popis imovine, potraživanja i obaveza nije obavljen u skladu sa relevantnim propisima (tačka 5.3.1 Izvještaja).*

---

<sup>1</sup> Odjeljak kojim revizor skreće pažnju korisnicima izvještaja na pitanja koja su prezentovana ili objelodanjena u informacijama vezanim za predmet revizije, a koje su, prema revizorovoj profesionalnoj prosudbi, jako važne za razumijevanje takvih informacija od strane korisnika izvještaja; u revizionoj praksi ovaj odjeljak se naziva još i 'isticanje pitanja'.

## ***Odgovornosti rukovodstva za finansijske izvještaje***

Rukovodstvo **Vijeća** je odgovorno za izradu i fer prezentaciju finansijskih izvještaja u skladu sa prihvaćenim okvirom finansijskog izvještavanja na nivou institucija Bosne i Hercegovine tj. Zakonom o finansiranju institucija BiH, Pravilnikom o finansijskom izvještavanju institucija BiH i Pravilnikom o računovodstvu s računovodstvenim politikama i procedurama za korisnike budžeta institucija BiH. Ova odgovornost podrazumijeva i kreiranje, primjenu i održavanje internih kontrola koje su relevantne za pripremu i prezentaciju finansijskih izvještaja koji ne sadrže materijalno značajne pogrešne iskaze uslijed prijevare ili greške, odgovarajuća objelodanivanja relevantnih informacija u napomenama uz finansijske izvještaje, kao i odabir i primjenu odgovarajućih računovodstvenih politika i računovodstvenih procjena, koje su razumne u datim okolnostima.

## ***Odgovornosti revizora za reviziju finansijskih izvještaja***

Naši ciljevi su steći razumno uvjerenje o tome da li su finansijski izvještaji kao cjelina sačinjeni bez značajnog pogrešnog prikazivanja uslijed prijevare ili greške i izdati izvještaj nezavisnog revizora koji uključuje naše mišljenje. Razumno uvjerenje je visok nivo uvjerenja, ali nije garancija da će revizija obavljena u skladu sa Međunarodnim standardima vrhovnih revizionih institucija uvijek otkriti značajno pogrešno prikazivanje kada ono postoji. Pogrešni prikazi mogu nastati uslijed prijevare ili greške i smatraju se značajnim ako se razumno može očekivati da, pojedinačno ili zbirno, utiču na ekonomske odluke korisnika donijete na osnovu tih finansijskih izvještaja.

Kao sastavni dio revizije u skladu sa Međunarodnim standardima vrhovnih revizionih institucija, stvaramo profesionalne procjene i održavamo profesionalni skepticizam tokom revizije. Mi također:

- Prepoznamo i procjenjujemo rizike značajnog pogrešnog prikazivanja finansijskih izvještaja, zbog prijevare ili greške, oblikujemo i obavljamo revizione postupke kao reakciju na te rizike i pribavljamo revizione dokaze koji su dovoljni i primjereni da osiguraju osnovu za naše mišljenje. Rizik neotkrivanja značajnog pogrešnog prikazivanja nastalog uslijed prijevare je veći od rizika nastalog uslijed greške, jer prijevare može uključiti tajne sporazume, krivotvorenje, namjerno izostavljanje, pogrešno prikazivanje ili zaobilaženje internih kontrola.
- Stičemo razumijevanje internih kontrola relevantnih za reviziju kako bismo oblikovali revizione postupke koji su primjereni u datim okolnostima, ali ne i za svrhu izražavanja mišljenja o uspješnosti internih kontrola.
- Ocjenjujemo primjerenost korištenih računovodstvenih politika i razumnost računovodstvenih procjena i povezanih objava koje je stvorilo rukovodstvo.
- Ocjenjujemo cjelokupnu prezentaciju, strukturu i sadržaj finansijskih izvještaja, uključujući i objave, kao i da li finansijski izvještaji odražavaju transakcije i događaje na kojima su zasnovani na način kojim se postiže fer prezentacija.

S rukovodstvom komuniciramo u vezi sa, između ostalih pitanja, planiranim djelokrugom i vremenskim rasporedom revizije i važnim nalazima revizije, uključujući i one koji se odnose na značajne nedostatke u internim kontrolama koji su otkriveni tokom naše revizije.

## 2. MIŠLJENJE O USKLAĐENOSTI

### ***Mišljenje***

U vezi sa revizijom finansijskih izvještaja **Vijeća** za 2020. godinu, izvršili smo i reviziju usklađenosti aktivnosti, finansijskih transakcija i informacija sa relevantnim zakonima i drugim propisima.

**Prema našem mišljenju, aktivnosti, finansijske transakcije i informacije Vijeća za 2020. godinu u skladu su, u svim materijalnim aspektima, sa zakonima i drugim propisima koji su definisani kao kriteriji za datu reviziju.**

### ***Osnova za mišljenje***

Reviziju usklađenosti smo izvršili u skladu sa Zakonom o reviziji institucija Bosne i Hercegovine i ISSAI 4000 - Standard za reviziju usklađenosti. Naše odgovornosti prema tim standardima su detaljnije opisane u odjeljku *Odgovornosti revizora za reviziju usklađenosti*.

Nezavisni smo od **Vijeća** u skladu sa etičkim zahtjevima koji su relevantni za našu reviziju i ispunili smo ostale etičke odgovornosti u skladu sa tim zahtjevima.

Vjerujemo da su reviziono dokazi koje smo pribavili dovoljni i odgovarajući da osiguraju osnovu za naše mišljenje.

### ***Odgovornosti rukovodstva za usklađenost***

Pored odgovornosti za pripremu i fer prezentaciju finansijskih izvještaja, rukovodstvo **Vijeća** je također odgovorno da osigura da su aktivnosti, finansijske transakcije i informacije u skladu sa propisima kojima su regulisane i potvrđuje da je tokom fiskalne godine osiguralo namjensko, svrsishodno i zakonito korištenje raspoloživih sredstava za ostvarivanje utvrđenih ciljeva, te ekonomično, efikasno i efektivno funkcionisanje sistema finansijskog upravljanja i kontrole.

### ***Odgovornosti revizora za reviziju usklađenosti***

Pored odgovornosti da izrazimo mišljenje o finansijskim izvještajima, naša odgovornost podrazumijeva i izražavanje mišljenja o tome da li su aktivnosti, finansijske transakcije i informacije u svim materijalnim aspektima, u skladu sa zakonima i drugim propisima kojima su regulisane. Odgovornost revizora uključuje obavljanje procedura, kako bi pribavili reviziono dokaze o tome da li se sredstva koriste za odgovarajuće namjene i da li je poslovanje **Vijeća**, prema definisanim kriterijima, usklađeno sa relevantnim zakonima i drugim propisima. Procedure podrazumijevaju procjenu rizika od značajnih neusklađenosti sa zakonima i propisima koji regulišu poslovanje subjekta revizije. Također, naša odgovornost podrazumijeva i ocjenu finansijskog upravljanja, funkcije interne revizije i sistema internih kontrola.

Sarajevo, 16.6.2021. godine

**GENERALNI REVIZOR**

Hrvoje Tvrtković, v.r.

**ZAMJENIK  
GENERALNOG REVIZORA**

Jasmin Pilica, v.r.

**ZAMJENIK  
GENERALNOG REVIZORA**

Ranko Krsman, v.r.



## II IZVJEŠTAJ O REVIZIJI

### 1. KRITERIJI

Ured za reviziju institucija Bosne i Hercegovine (u daljem tekstu: Ured za reviziju) izvršio je reviziju finansijskih izvještaja i, u vezi s istom, reviziju usklađenosti. Revizija finansijskih izvještaja i revizija usklađenosti podrazumijeva proces objektivnog prikupljanja i procjenjivanja dokaza, kako bi se utvrdilo da li su predmeti revizije, tj. finansijski izvještaji, kao i aktivnosti, finansijske transakcije i informacije, usklađeni s odgovarajućim kriterijima koji su sadržani u zakonima i drugim propisima. Kriteriji predstavljaju uporedne parametre koji se koriste kako bi se dala ocjena predmeta revizije.

Za ocjenu usklađenosti sa zakonima i drugim propisima korišteni su sljedeći kriteriji:

- Zakon o budžetu institucija BiH i međunarodnih obaveza BiH za 2020. godinu
- Zakon o plaćama i naknadama u institucijama BiH i podzakonski akti
- Zakon o porezu na dohodak i Zakon o doprinosima (FBiH i RS)
- Zakon o javnim nabavkama i podzakonski akti
- Zakon o državnoj službi u institucijama BiH i podzakonski akti
- Zakon o radu u institucijama BiH i podzakonski akti
- Zakon o upravi i podzakonski akti
- Zakon o finansiranju institucija BiH.

### 2. REALIZACIJA RANIJIH PREPORUKA

Ured za reviziju izvršio je finansijsku reviziju Vijeća za 2019. godinu, sačinio Izvještaj o obavljenoj finansijskoj reviziji i dao pozitivno mišljenje na finansijske izvještaje i pozitivno mišljenje na usklađenost sa zakonima i drugim propisima. U Izvještaju o obavljenoj finansijskoj reviziji Vijeća za 2019. godinu nije bilo datih preporuka.

### 3. SISTEM INTERNIH KONTROLA

Vijeće je odgovorno za kreiranje, primjenu i održavanje internih kontrola koje su relevantne za pripremu i prezentaciju finansijskih izvještaja i usklađenost poslovanja sa zakonima i drugim propisima.

Unutrašnja organizacija i način rada Vijeća utvrđeni su Pravilnikom o unutrašnjoj organizaciji i sistematizaciji na koji je Vijeće ministara BiH dalo saglasnost u novembru 2019. godine. Pravilnikom o unutrašnjoj organizaciji Vijeća, uređen je način rada i rukovođenja Vijećem, te opis radnih mjesta državnih službenika i zaposlenika. Istim su sistematizovana radna mjesta za 29 izvršilaca (šest članova Vijeća, 19 državnih službenika i četiri zaposlenika).

Šest članova Vijeća se imenuje na mandat od šest godina na sljedeći način: tri člana imenuje Vijeće ministara BiH, po jednog iz sva tri konstitutivna naroda (imenovani 26.4.2017. godine), dva člana imenuje Vlada FBiH (imenovani 30.9.2016. godine) i jednog člana imenuje Vlada Republike Srpske (imenovan 20.01.2017. godine).

Vijeće ministara BiH, na prijedlog Vijeća, imenuje svake godine predsjednika iz reda članova Vijeća na period od jedne godine, bez prava na ponovni izbor tokom mandata člana Vijeća. Vijeće ministara BiH je imenovalo predsjednika Vijeća na mandatni period od jedne godine, počev od 1.6.2020. godine. Predsjednik Vijeća ovlašten je da: a) rukovodi radom Vijeća; b) zastupa i predstavlja Vijeće; c) saziva i predsjedava sjednicama Vijeća; d) sastavlja dnevni red za svaku sjednicu, koji može biti dopunjen na sjednici na zahtjev najmanje dva prisutna člana Vijeća; e) potpisuje sve odluke i druge akte Vijeća.

Sistem finansijskog upravljanja i kontrole se implementira u skladu sa Zakonom o finansiranju institucija BiH<sup>2</sup>, Priručnikom za finansijsko upravljanje i kontrolu i Smjernicama za provođenje procesa upravljanja rizicima u institucijama BiH. Vijeće je usvojilo Akcioni plan za uspostavu i razvoj sistema finansijskog upravljanja i kontrole za 2020. godinu na osnovu kojeg su provedene određene aktivnosti (ažuriran Registar rizika, proveden postupak interne kontrole administrativnih, upravljačkih i računovodstvenih postupaka, sačinjen Izvještaj o provođenju Akcionog plana i dr.).

U skladu sa Zakonom o internoj reviziji institucija BiH<sup>3</sup> i Odlukom o kriterijima za uspostavljanje jedinica interne revizije u institucijama BiH<sup>4</sup>, Jedinica interne revizije Ministarstva vanjske trgovine i ekonomskih odnosa BiH nadležna je za obavljanje interne revizije u Vijeću. Jedinica interne revizije nije dostavila Vijeću Godišnji plan interne revizije za 2020. godinu, kao ni Strateški plan interne revizije za period 2020 – 2022. godina, niti je obavljala internu reviziju u Vijeću u tekućoj godini.

#### **4. BUDŽET**

Zakonom o budžetu institucija Bosne i Hercegovine i međunarodnih obaveza Bosne i Hercegovine za 2020. godinu<sup>5</sup>, Vijeću su odobrena sredstva u ukupnom iznosu od 1.239.000 KM. Ukupno izvršenje budžeta za 2020. godinu iznosilo je 1.188.600 KM ili 96%.

Vijeće je izvršilo prestrukturisanja rashoda budžeta, koje je odobrilo Ministarstvo finansija i trezora BiH<sup>6</sup>, prema kojima je izvršena izmjena strukture rashoda unutar odobrenog budžeta. Ukupan iznos prestrukturisanja iznosio je 10.000 KM (povećani izdaci telefonskih i poštanskih usluga za 1.000 KM, nabavka materijala za 500 KM, izdaci za tekuće održavanje za 500 KM, ugovorene i druge usluge za 1.000 KM i nabavka opreme za 7.000 KM, a smanjeni putni troškovi za 3.000 KM i nabavka stalnih sredstava u obliku prava za 7.000 KM).

#### **5. FINANSIJSKI IZVJEŠTAJI**

Vijeće je sačinilo Godišnji finansijski izvještaj za 2020. godinu i dostavilo ga nadležnim organima i institucijama u skladu sa važećim propisima i u utvrđenom roku. Analizom bilješki uz finansijske izvještaje konstatovano je da su sačinjene prema Pravilniku o finansijskom izvještavanju institucija BiH<sup>7</sup>.

---

<sup>2</sup> Službeni glasnik BiH, broj 61/04, 49/09, 42/12, 87/12 i 32/13

<sup>3</sup> Službeni glasnik BiH, broj 27/08 i 32/12

<sup>4</sup> Službeni glasnik BiH, broj 59/19

<sup>5</sup> Službeni glasnik BiH, broj 46/20

<sup>6</sup> Odluka, broj: 05-16-2-6372-3/20 od 28.9.2020. godine, ukupan iznos 7.000 KM i

Odluka, broj: 05-16-2-8322-2/20 od 16.12.2020. godine, ukupan iznos 3.000 KM

<sup>7</sup> Službeni glasnik BiH, broj 25/15 i 91/17

## 5.1 Pregled rashoda i izdataka iz budžeta

U pregledu rashoda i izdataka po ekonomskim kategorijama-zbirno, u periodu od 01.01. do 31.12.2020. godine, ukupno ostvareni rashodi iskazani su u iznosu od 1.188.600 KM, što je za 50.400 KM manje u odnosu na rashode planirane budžetom za 2020. godinu.

Značajni rashodi iz budžeta za neposrednu potrošnju odnose se na: bruto plaće (996.132 KM), naknade zaposlenih (123.341 KM), izdatke telefonskih i poštanskih usluga (19.983 KM) i unajmljivanje imovine i opreme (4.800 KM).

***Pregled rashoda i izdataka iz budžeta prikazan je u Tabeli I u prilogu Izvještaja.***

### 5.1.1 Bruto plaće

Bruto plaće i naknade iz plaća na 31.12.2020. godine iskazane su u iznosu od 996.132 KM, od čega neto plaće i naknade iznose 586.410 KM, a porezi i doprinosi 409.722 KM. Bruto plaće i naknade su manje u odnosu na prethodnu godinu za 15.932 KM što je posljedica manjeg prosječnog broja zaposlenih u 2020. godini u odnosu na 2019. godinu. Prosječan broj zaposlenih za koje su isplaćene bruto plaće u Vijeću bio je 27.

**Neplaćeno odsustvo:** Jedan državni službenik se nalazi na neplaćenom odsustvu (iz prethodnih godina koje još uvijek traje) radi spajanja porodice, jer bračni partner boravi u inostranstvu po osnovu odluke Ministarstva vanjskih poslova BiH.

**Raspoređivanje zaposlenih unutar platnih razreda:** Vijeće je u 2020. godini primijenilo Metodologiju za raspoređivanje zaposlenog unutar platnog razreda<sup>8</sup> tako da je pomjereno sedam zaposlenih (pet državnih službenika i dva zaposlenika) za jedan ili više unutrašnjih platnih razreda. Kao kriteriji za napredovanje korištene su ocjene za određeni period kao i stečeni viši stepen stručnih ili naučnih zvanja. Za svakog zaposlenog je doneseno rješenje o razvrstavanju u unutrašnji platni razred vodeći pri tome računa da ne prelaze limit od 30% ukupnog broja zaposlenih.

Daljim postupcima revizije utvrđeno je da je primjena Metodologije počela od 1.9.2020. godine, a da su rješenja donesena krajem decembra 2020. godine. Razlika iznosa uplaćena je u decembru 2020. godine pod posebnom obradom plaće.

Uvidom u dokumentaciju uočili smo da se za jednog državnog službenika pomjeranje u viši unutrašnji platni razred temeljilo na redovno stečenoj diplomi (koja je bila osnova za zaposlenje), te da stoga ne predstavlja stečeni viši stepen stručnog ili naučnog zvanja. Navedena osoba je kao državni službenik zaposlena u maju 2019. godine (prethodno bila zaposlena po ugovoru o djelu), te da ocjene rada nisu bile osnova za pomjeranje u viši unutrašnji platni razred.

Član 6. stav (5) Metodologije za raspoređivanje zaposlenog unutar platnog razreda definiše da zaposleni napreduje u viši unutrašnji platni razred nakon sticanja jednog višeg stepena stručnih ili naučnih zvanja ukoliko je to zvanje u direktnoj vezi s opisom poslova radnog mjesta na koji je zaposleni raspoređen, ukoliko doprinosi većoj učinkovitosti, unapređenju i razvoju procesa rada na radnom mjestu, da je proveo godinu dana u radnom odnosu u instituciji BiH i da u

---

<sup>8</sup> Službeni glasnik BiH, broj 6/12 i 76/20

prethodnom periodu ocjenjivanja nije dobio ocjenu "ne zadovoljava". Prema stavu (6) ovog člana pod višim stepenom stručnih ili naučnih zvanja iz stava (5) podrazumijeva se stepen stručnih ili naučnih zvanja koje zaposleni trenutno ima i koji je viši u odnosu na stepen zvanja propisan za radno mjesto na koje je zaposleni raspoređen.

Dakle, Vijeće prilikom pomjeranja zaposlenih u viši unutrašnji platni razred nije pravilno primijenilo odredbe Metodologije za raspoređivanje zaposlenog unutar platnog razreda, jer je izvršilo pomjeranje po osnovu stepena zvanja propisanog za radno mjesto, te je shodno tome potrebno da Vijeće preispita doneseno rješenje.

## **PREPORUKA 1**

**Vijeće je dužno prilikom pomjeranja zaposlenih u viši unutrašnji platni razred dosljedno primijeniti odredbe Metodologije za raspoređivanje zaposlenog unutar platnog razreda.**

### **5.1.2 Unajmljivanje imovine i opreme**

Ukupni izdaci za unajmljivanje imovine i opreme sa 31.12.2020. godine iznose 4.800 KM. Predmetni izdaci se odnose na zakup poslovnog prostora Vijeća, za potrebe Ureda u Banjoj Luci (u kojem rade dvije osobe), na osnovu Ugovora o zakupu zaključenog 14.4.2017. godine na neodređeno vrijeme. Mjesečna zakupnina iznosi 400 KM za 19 m<sup>2</sup> sa uključenim režijskim troškovima.

### **5.2 Pregled prihoda i primitaka**

Ukupno ostvareni prihodi i primici po ekonomskim kategorijama u periodu od 01.01. do 31.12.2020. godine, iskazani su u iznosu od 274.494 KM. Strukturu ostvarenih prihoda čine: administrativne takse u vezi sa procesnim radnjama pred Vijećem (119.700 KM), kazne po Zakonu o konkurenciji<sup>9</sup> (151.094 KM) i administrativne takse na podneske kojima se traži mišljenje (3.500 KM) i ostali prihodi (200 KM).

### **5.3 Bilans stanja**

U bilansu stanja na 31.12.2020. godine iskazana su ukupna sredstva u iznosu od 33.790 KM. Ukupne obaveze s izvorima sredstava iskazane su u iznosu od 142.338 KM.

Značajne stavke bilansa stanja odnose se na neotpisanu vrijednost stalnih sredstava (33.726 KM) i obaveze prema zaposlenima (99.692 KM).

***Bilans stanja prikazan je u Tabeli II u prilogu Izvještaja.***

---

<sup>9</sup> Službeni glasnik BiH, broj 48/05, 76/07 i 80/09

### 5.3.1 Popis sredstava i obaveza

Rješenjem Vijeća formirana je Komisija za redovni popis osnovnih sredstava. Komisija je otpočela s radom 19.12.2020. godine, konačan popis osnovnih sredstava završen je 31.12.2020. godine u uredima u Sarajevu, Mostaru i Banjoj Luci. Nakon urađenog popisa pristupilo se usklađivanju lokacija u modulu Osnovnih sredstava. Prilikom popisa nisu uočeni viškovi niti manjkovi sredstava.

*Popis imovine, potraživanja i obaveza nije izvršen prema relevantnim propisima.*

Analizom izvještaja Komisije za popis stalnih sredstava konstatovali smo da izvještaj Komisije još uvijek nije usvojen od strane predsjedavajućeg Vijeća iz razloga jer nisu osigurani svi potpisi članova koji su učestvovali u

radu Komisije. Također, stalna sredstva koja su u izvještaju Komisije za 2019. godinu predložena za otpis, zbog neupotrebljivosti i neisplativosti popravke, još uvijek nisu predana ovlaštenoj firmi za uništenje elektronskog otpada. Krajem tekuće godine (22.12.2020. godine) potpisan je Ugovor sa ovlaštenom firmom za preuzimanje i uništenje elektronskog otpada s rokom važenja do kraja godine, ali do dana završne revizije ništa nije urađeno po tom pitanju.

Članovima od 37. do 41. Pravilnika o računovodstvu s računovodstvenim politikama i procedurama za korisnike budžeta institucija Bosne i Hercegovine<sup>10</sup> definisani su rokovi i postupak provođenja godišnjeg popisa. Godišnji popis treba biti okončan na propisan način prije predaje godišnjeg finansijskog izvještaja nadležnim institucijama s obzirom na to da je osnova za svođenje knjigovodstvenog stanja na stvarno stanje utvrđeno popisom.

#### PREPORUKA 2

**Vijeće je dužno u potpunosti izvršiti popis imovine, potraživanja i obaveza prema odredbama Pravilnika o računovodstvu s računovodstvenim politikama i procedurama za korisnike budžeta institucija Bosne i Hercegovine.**

## 6. ZAPOŠLJAVANJE I STATUS ANGAŽOVANIH OSOBA

Zakonom o budžetu institucija BiH i međunarodnih obaveza BiH za 2020. godinu, Vijeću je odobreno 28 zaposlenih. Na 31.12.2020. godine, Vijeće je imalo 28 zaposlenih, od čega je 26 zaposleno na neodređeno vrijeme, a dvoje na određeno vrijeme (dva pripravnika).

Prijem dva pripravnika je izvršen u decembru 2020. godine putem javnog konkursa na period od godinu dana. Također, u tekućoj godini je prestao radni odnos za dva pripravnika istekom ugovora o radu koji su zaključeni u 2019. godini. Nakon isteka ugovora o radu, jedan od ovih pripravnika je angažovan po ugovoru o djelu na period od četiri mjeseca kao zamjena za tehničkog sekretara, odsutnog zbog teške bolesti.

Putem ugovora o djelu, u Vijeću su angažovane još dvije osobe (za usluge čišćenja poslovnih prostorija u Uredu u Sarajevu tokom cijele godine i za jednokratno izvršene IT usluge).

Vijeće je vršilo redovno ocjenjivanje zaposlenika i državnih službenika.

<sup>10</sup> Protokol Ministarstva finansija i trezora Bosne i Hercegovine, broj 01-08-02-1-1515-1/15, od 4.2.2015. godine

## 7. JAVNE NABAVKE

Prema prezentovanim podacima, Vijeće je u 2020. godini vršilo nabavke putem direktnih sporazuma. Ukupna vrijednost nabavki iznosila je 12.316 KM.

## 8. KOMENTARI

Vijeće u ostavljenom roku nije dostavilo komentare na Nacrt izvještaja o obavljenoj finansijskoj reviziji za 2020. godinu, tako da ovaj Izvještaj predstavlja konačan izvještaj bez korekcija u odnosu na Nacrt izvještaja o obavljenoj finansijskoj reviziji za 2020. godinu.

### **Vođa tima za finansijsku reviziju**

Mirsada Sijamić, viši revizor, v.r.

### **Rukovodilac Odjela za finansijsku reviziju**

Miro Galić, viši revizor, v.r.

### **Članovi tima za finansijsku reviziju**

Ivana Jurčević, revizor, v.r.

Osman Paćuka, revizor, v.r.

### **Rukovodilac Odjela za razvoj, metodologiju i kontrolu kvaliteta finansijske revizije**

Dragoljub Kovinčić, viši revizor, v.r.

## **Prilozi**

Tabela I – Pregled rashoda budžeta za 2020. godinu

Tabela II – Bilans stanja na 31.12.2020. godine

Izjava o odgovornostima rukovodstva

## Pregled rashoda budžeta za 2020. godinu

KONKURENCIJSKO VIJEĆE BIH

Tabela I

Opis	Odobreni budžet	Usklađivanja budžeta	Ukupni budžet (2+3)	Izvršenje budžeta	Procenat 5/4*100
1	2	3	4	5	6
<b>1. Tekući izdaci</b>	<b>1,231,000</b>	<b>0</b>	<b>1,231,000</b>	<b>1,188,600</b>	<b>97</b>
Bruto plaće i naknade	1,006,000		1,006,000	996,132	99
Naknade troškova zaposlenih	131,000		131,000	123,341	94
Putni troškovi	18,000	-3,000	15,000	2,787	19
Izdaci telefonskih i pošt. usluga	20,000	1,000	21,000	19,983	95
Izdaci za energiju i kom. usluge	1,000		1,000	600	60
Nabavka materijala	8,000	500	8,500	7,002	82
Izdaci za usl. prijevoza i goriva	7,000		7,000	3,573	51
Unajmljivanje imovine i opreme	5,000		5,000	4,800	96
Izdaci za tekuće održavanje	6,000	500	6,500	4,951	76
Izdaci za osiguranje	4,000		4,000	1,889	47
Ugovorene i druge posebne usluge	25,000	1,000	26,000	23,543	91
<b>2. Kapitalni izdaci</b>	<b>8,000</b>	<b>0</b>	<b>8,000</b>	<b>0</b>	<b>0</b>
Nabavka zemljišta			0		
Nabavka građevina			0		
Nabavka opreme	1,000	7,000	8,000		0
Nabavka stalnih sredstava u obliku prava	7,000	-7,000	0		
Rekonstrukcija i invest.održavanje			0		
<b>3. Tekući grantovi</b>	<b>0</b>	<b>0</b>	<b>0</b>	<b>0</b>	
			0		
			0		
<b>4. Budžet-neposredna potrošnja(1+2+3)</b>	<b>1,239,000</b>	<b>0</b>	<b>1,239,000</b>	<b>1,188,600</b>	<b>96</b>
<b>5. Višegodišnja kapitalna ulaganja</b>	<b>0</b>	<b>0</b>	<b>0</b>	<b>0</b>	
			0		
<b>6. Novčane donacije</b>	<b>0</b>	<b>0</b>	<b>0</b>	<b>0</b>	
			0		
<b>7. Programi posebne namjene</b>	<b>0</b>	<b>0</b>	<b>0</b>	<b>0</b>	
			0		
<b>8. Ukupno (4+5+6+7)</b>	<b>1,239,000</b>	<b>0</b>	<b>1,239,000</b>	<b>1,188,600</b>	<b>96</b>

Rukovodstvo je Pregled rashoda budžeta po ekonomskim kategorijama odobrilo \_\_\_\_\_ 2021. godine.

Predsjednik

## Bilans stanja na 31.12.2020. godine

KONKURENCIJSKO VIJEĆE BIH

Tabela II

Opis	31.12.2020.	31.12.2019.	Procenat 2/3*100
1	2	3	4
<b>1. Gotovina, krat. potraživanja, razgraničenja i zalihe</b>	<b>63</b>	<b>63</b>	<b>100</b>
Novčana sredstva	0	0	
Kratkoročna potraživanja	63	63	100
Kratkoročni plasmani			
Interni finansijski odnosi			
Zalihe			
Kratkoročna razgraničenja			
<b>2. Stalna sredstva</b>	<b>33,726</b>	<b>74,898</b>	<b>45</b>
Stalna sredstva	453,560	479,649	95
Ispravka vrijednosti	419,833	404,752	104
Neotpisana vrijednost stalnih sredstava	33,726	74,898	45
Dugoročni plasmani			
Dugoročna razgraničenja			
<b>UKUPNO AKTIVA (1+2)</b>	<b>33,790</b>	<b>74,961</b>	<b>45</b>
<b>3. Kratkoročne obaveze i razgraničenja</b>	<b>108,611</b>	<b>100,768</b>	<b>108</b>
Kratkoročne tekuće obaveze	8,920	6,666	134
Kratkoročni krediti i zajmovi			
Obaveze prema zaposlenima	99,692	94,102	106
Interni finansijski odnosi			
Kratkoročna razgraničenja			
<b>4. Dugoročne obaveze i razgraničenja</b>	<b>0</b>	<b>0</b>	
Dugoročni krediti i zajmovi			
Ostale dugoročne obaveze			
Dugoročna razgraničenja			
<b>5. Izvori sredstava</b>	<b>33,726</b>	<b>74,898</b>	<b>45</b>
Izvori sredstava	33,726	74,898	45
Ostali izvori sredstava			
Neraspoređeni višak prihoda/rashoda			
<b>UKUPNO PASIVA (3+4+5)</b>	<b>142,338</b>	<b>175,665</b>	<b>81</b>

**Napomena:** Pravilnikom o finansijskom izvještavanju institucija Bosne i Hercegovine, čl.10. stav 4., napomenuto je da bilans stanja budžetskih korisnika **neće biti uravnotežen** (aktiva jednaka pasivi) zbog programski uspostavljenog sistema Glavne knjige, dok će bilans stanja koji radi Ministarstvo finansija i trezora na nivou Budžeta institucija Bosne i Hercegovine za tekuću godinu biti uravnotežen.

Rukovodstvo je Bilans stanja odobrilo \_\_\_\_\_ 2021. godine.

Predsjednik



## Izjava o odgovornostima rukovodstva

Međunarodni standard vrhovnih revizionih institucija (ISSAI 1580) predviđa da revizor treba dobiti odgovarajuću izjavu od rukovodstva institucije kao dokaz da rukovodstvo priznaje svoju odgovornost za objektivno prikazivanje finansijskih izvještaja saglasno mjerodavnom okviru finansijskog izvještavanja, te da je odobrilo finansijske izvještaje.

Rukovodstvo **Konkurencijskog vijeća Bosne i Hercegovine** (u daljem tekstu: Vijeće) dužno je osigurati da finansijski izvještaji za 2020. godinu budu izrađeni u skladu sa Zakonom o finansiranju institucija Bosne i Hercegovine (Službeni glasnik BiH, broj 61/04, 49/09, 42/12, 87/12 i 32/13), Pravilnikom o finansijskom izvještavanju institucija Bosne i Hercegovine (Službeni glasnik BiH, broj 25/15 i 91/17) i Pravilnikom o računovodstvu sa računovodstvenim politikama i procedurama za korisnike budžeta institucija Bosne i Hercegovine (protokol Ministarstva finansija i trezora Bosne i Hercegovine, broj 01-08-02-1-1515-1/15, od 4.2.2015.). Rukovodstvo je također obavezno postupati u skladu sa Zakonom o budžetu institucija Bosne i Hercegovine i međunarodnih obaveza Bosne i Hercegovine za 2020. (Službeni glasnik BiH, 46/20) i pratećim uputstvima, pojašnjenjima i smjernicama koje donosi Ministarstvo finansija i trezora Bosne i Hercegovine, kao i ostalim zakonima u Bosni i Hercegovini, tako da finansijski izvještaji daju fer i istinit prikaz finansijskog stanja Vijeća.

Pri sastavljanju takvih finansijskih izvještaja odgovornosti rukovodstva obuhvataju garancije:

- da je osmišljen i da se primjenjuje i održava sistem internih kontrola koji je relevantan za pripremu i fer prezentaciju finansijskih izvještaja i usklađenost sa zakonima i drugim propisima;
- da finansijski izvještaji ne sadrže materijalno značajne pogrešne iskaze;
- da finansijski izvještaji sadrže sve relevantne podatke i analize izvršenja budžeta, kao i podatke o sistemu internih kontrola i realizaciji preporuka revizije;
- da se u poslovanju primjenjuju važeći zakonski i drugi relevantni propisi.

Rukovodstvo je također odgovorno za čuvanje imovine i resursa od gubitaka, pa stoga i za preduzimanje odgovarajućih mjera kako bi se spriječile i otkrile pronevjere i ostale nezakonitosti.

Datum, 1.4.2021.

Predsjednik Vijeća

dr. Stjepo Pranjić